

灌縣志卷十八

紀第四

撫餘紀 災祥 神話 異物 軼聞

天道悠遠人事粉糅物變無常難以理測然網羅舊聞曷遺纖細漢志稱小
說累百亦自名家苟有可觀足裨博物固史氏所不廢也邑乘所載雖僅一
隅具體而微儼同國史可挂漏哉片羽碎鱗莫非珍寶捐之則事有所闕隸
之則類無所歸爰掇其餘以助多識

休咎之說基於洪範五行春秋所書具有微意漢儒據以釋經史籍因而附
會雖涉浮誕然天人之際不可誣也今世俗瀆殘民以逞謬託天演淘汰禍
且無窮夫妖由人興孽原自作古人遇災而懼不因祥而滿亦以德可回天
誠能動物戰兢惕厲不違也灌據長江上游恆苦水患李守勤求民隱而利
賴至今豈不在人事哉因綴所聞昭茲來許

灌縣志

卷十八 撫餘紀

一

漢惠帝二年春正月地震至秋八月乃止五年夏大旱江水少谿谷絕高后

八年江水溢流萬餘家成帝元延三年岷山崩壅江三日江水竭前漢書

唐文宗開成四年西川水害稼及民廬舍新唐書昭宗天復六年夏四月巨人

見青城山十國春秋後蜀廣政二十二年春正月龍見玉壘關時宋太祖建隆元年

宋太祖乾德七年青城縣民王宥妻產三男真宗咸平六年夏五月導江縣

民潘矩田生芝三層黃紫色高五寸許祥符五年導江縣民趙元貴青城縣

民王偉田禾皆一莖九穗仁宗皇祐二年秋九月永康軍田禾一莖九穗神

宗熙寧五年秋七月永康軍生紫芝九本冬十有一月永康軍生紫芝九本

哲宗元祐六年永康軍禾合穗紹聖元年永康軍禾異畝同穎合秀至九莖

九年永康軍飢高宗紹興三年秋七月霖雨至八月乃止五年夏六月大水

六年大疫夏旱大飢孝宗隆興元年大飢春三月大旱至於秋八月八年秋

八月大水漂民廬沒田畝九年大飢寧宗嘉泰元年大旱十年江水沒城郭
十六年夏五月大水理宗寶祐二年雨血地震宋史

元武宗至大二年春三月大飢順帝元統八年大旱至正八年四川旱饑禁

酒元史

明英宗正統五年自夏六月不雨至於秋八月天順三年旱憲宗成化六年
旱二十二年秋九月辛亥地一日數震皆有聲次日復震孝宗弘治元年冬
十有二月辛卯地震連三日二年夏五月庚申地震連三日有聲七年旱世
宗嘉靖元年旱二年旱赤地千里八年大飢神宗萬曆二十五年春正月壬
辰朔地震連三月三十七年旱熹宗天啟七年大旱明史
清順治四年蜀大饑五年再饑赤地千里康熙二十一年秋七月江水損民
居傷稼三十四年大有年雍正元年大旱乾隆元年大水冲沒田廬甚多二

灌縣志

卷十八 撫餘紀

二

十八年春正月初六日地震初八日地震初七日地震三十年妖術翦髮三
十二年秋七月二十四日晨兩日相鬪有聲是冬征緬甸三十三年春二月
二十五日夜天鼓鳴秋七月十四日大雷雨山中漂沒人家三十五年秋天
空有聲如礮百鳥皆鳴五十一年春正月朔日食夏五月初六日地大震河
水上岸人有仆者自是數震至六月始止冬十月十二日兩日並見五十二
年春正月十五日夜月逆行冬十一月初五日夜地大震屋瓦多墜二十五
日大雪五十三年秋八月初六日夜風雷拔木損禾初七日雪雹傷穀初八
日有大星在西南是夜雷電以風五十四年夏五月二十五日水暴至毀新
街秋七月初三日大風雷雨地震冬十月二十四日夜天鼓鳴五十六年春
二月十五日有星甚大無光而赤嘉慶十一年春三月江水竭道光三十年
春正月朔日有食之既咸豐三年春正月十五日地震夏四月初三日白虹

貫日秋七月初 日夜有黑氣如虹長數十丈四年鳳凰山崩沒田畝十年
春正月熒惑犯南斗三月甲申入斗夏四月丁亥退在十二度秋八月入牛
初度彗星見東方十一年夏五月二十五日夜流星白芒見北方初起有聲
侵入紫微垣出闔闔門復繞北斗入天市六月乃散秋七月下旬紫宮內有
星如鏡九月初四日夜有二星如月色赤十二日犯鬼次天狼見於參東十
六日有三星犯井界久乃去同治元年春二月慧星見東方夏四月有流星
出紫微垣而散秋七月彗星見北斗下二年夏四月金星火星同度在井火
星無光五月都江堰決傷稼冬川西道何咸宜鑿去三道崖趾三年夏四月
泊江河水立數尺旋起旋仆旬餘始止六月金井二星逆行於井度四年春
正月十三日夜月紅如日二月金星有芒夏五月初旬大水都江堰決冬十
二月十九日地震六年夏五月二十日大水壞田廬都江堰決冬十月二

灌縣志

卷十八 撫餘紀

三

十二日白虹貫日七年夏六月大疫冬十二月二十五日日邊虹見九年夏
六月二十四日雨雹大風拔木十年冬十月朔日夜大雪折竹木十三年夏
六月朔日地震有聲如雷二十日夜漩口場山突發洪水沒民房數十家淹
斃三百餘人光緒元年春二月十四日地震二年大水壞田廬橋梁甚衆五
年夏五月初五日雨雹大風拔木七年夏五月初五日大風白沙江溢溺者
甚衆六月十九日夜有星白芒在華蓋東秋七月二十七日夜有星起芒在
轅軒星上八年秋八月二十八日彗星見東方張翼度光射西方數月乃滅
是冬紅光朝夕見二十年夏五月十四日月中有白氣橫貫月輪兩端銳同
月有火守心經旬始不見二十三年夏五月初十日雨雹如卵害禾稼六月
大雨玉屏山水溢壞學署二十四年縣民余某妻一產三男皆殤二十五年
夏六月夜有白氣貫月其秋八國聯軍犯京師二十七年陰雨晝晦有電自

東南而東北狀如繩末如球倏忽數次乃滅宣統二年夏四月彗星見西方
光芒數十丈旬餘始沒三年彗星復見西方經月餘秋八月日食晝晦

蜀龜鑑
灌記

前志
新采

民國二年冬十月十五日夜中有白光自東而西長竟天移時散爲雲氣青
白相半三年十月地震六年秋七月微雨雷鳴於東方如金鼓聲十二年夏
五月大雨連旬灌城積水可以盪舟岷沱江漲壞田廬死人畜十三年冬十
有一月東門外朱紫街失慎焚二百餘家死數人十四年春三月初七日古
溪溝水捲如筒高數丈移時始散三日前有黑蛇見是年冬十一月崇德廟
災廟宏麗冠蜀中夜間突成焦土時駐軍寄物充棟人以爲祝融示警焉十
五年春三月初八日地震屋撼有聲十五年六月初三日夜有大星明如鑑
自南而北光照地十六年夏淫雨江漲平原大水城東北之蒲陽河隄決報

灌縣志

卷十八 撫餘紀

四

恩寺舊壤成澤國圯沿岸地二百餘畝漂廬宅四十餘家居民蚤徙幸免於
難六月十九日雨雹十七年夏五月二十日夜朱紫街大火延及豬市街焚
七百餘家死十餘人投河溺斃者數十人損財產四十餘萬金紅會倡募振

之新

采

民國十九年鎖龍橋崩先是橋以木建石礎牢甚閱百年不壞忽有建議用
石折縣城礮臺爲之而舊橋實未圯略加補葺可再支數十年至是破毀無
遺倉卒更新識者知其必敗工未竟而右洞果塌溺十餘人巨石重覆水爲
之赤旋復之時春二月也未幾左洞復塌死數人因輟工及仲夏酷暑納涼
者夜臥橋上而中洞又塌死約十人水勢湍悍有不獲其尸者詛言之聲大
起當道乃暫以繩橋代凡虛擲數千金是年五月城東朱紫火蒲陽場亦火
各焚數十家夏六月大雨江溢白沙積木飄去崇德廟山崩阻索橋不通者

數日毀民房十餘家西關與離堆牆壁亦圯外江之張家灣林巷子皆決冲沒田廬馬家渡索橋不通以筏助之秋七月中旬淫雨數日江益漲所至成

災城中多泛為澤國

新采

民國二十年二月補築馬家渡張家灣等決口夏秋淫雨復多潰決民被其災二十一年六月江漲再旬始減地震七月縣城大風拔木雨雹關岳廟牆圯石獅墜地損壞西門外行人有被木壓斃者民宅亦頗摧折

新采

學者每訾鬼神好為高論彼赤符應讖玉杯改元事涉荒唐誠不足道然如帝許伐罪而惠敗韓神錫土田而虢遂滅幽明顯晦理有同然載籍可徵實憑感召蜀自蠶叢啓宇靈蹟較多若盡目為子虛則古之秩祀皆妄豈其然哉東坡說鬼干寶搜神知古人不皆憤憤也

龍溪在縣西三十里世傳禹導江有牛出此溪化為龍圖名

舊志

按今譌作尤

灌縣志

卷十八 撫餘紀

五

溪與縣接壤有市集屬汶川溪水則南入灌境

朱提有一女子名利從江源井中出為杜宇妻

通志紀聞

按常志云朱提梁氏女

利游於江源杜宇悅之納為妃則無井中之說也

秦使李冰為蜀守開成都兩江漑田萬頃初江神歲取女二人為婦冰乃自以其女與神婚經去祠前勸神酒酒杯澹澹因厲聲責之遂皆不見良久有蒼牛鬪於岸上有間冰還謂官屬曰吾鬪疲極不當相助耶南向腰正白者我綬也主簿刺北面者江神遂死

風俗通

蜀守父子控健畫於離堆之趾謂之伏龍潭

治水記

青城縣二里許有老君觀觀有泉名跑馬泉水味甘美四時不絕春夏若冰秋冬轉溫昔老君與天皇真人會真之所其泉是老君乘馬跑成即冲妙觀也杜光庭有記

錄異記蜀中名勝記

王象之碑曰延慶觀有靈寶真人五福幢靈寶要略云太上以五篇真文授帝借帝借得仙封之於鍾山吳越春秋云禹治洪水至牧德之山見神人云我有靈寶五符以役蛟龍水豹子事畢可秘於靈山後龍威丈人得符獻之吳王闔閭李膺益州記云天皇真人授帝借五符文於此山牧德之臺謂禹所至之牧德山即青城也全蜀藝文志趙清獻於玉局觀新建五符幢文同爲記稱元始至尊肇探於太樸之先煥譯妙勢爲天奧寶自然秘文不易下傳漢桓帝永壽時正一道陵患魑魅恣雜闢人鬼使異行植幢岷山誓刻嚴毒自是判然幽明不殺皇唐文缺重錄置昭慶道祠是幢實始張陵至開元重刻也

青城山記補正

唐乾元元年薛偉任青城縣主簿與丞鄒滂尉雷濟裴察同官偉嘗病七日奄然若死而心下微暖家人環伺之經十二日蘇告左右曰急視羣官食膾

灌縣志

卷十八 撫餘紀

六

否吾已蘇有奇事請輟筮來聽也既至偉曰諸君令司戶僕張弼求魚乎曰然又問曰漁人趙幹藏巨鯉以小者應汝於葦間得藏者攜以來司戶吏坐門東紉曹吏坐門西方奕及階鄒雷方博裘陷桃實弼言幹藏巨魚裴令鞭之以魚付食工王士良信乎衆駭曰子何以知之曰吾初疾因爲熱逼欲求涼恍惚策杖出游江畔見澄潭可愛偶思浴解衣入水頗縱適自顧身倏化魚遂爲幹得至縣所見如前士良方礪刃斫我我呼泣而三君弗顧彼頭墮此遂醒爾所言歷歷諸人皆見魚口動而實無所聞遂相戒終身不食膾偉疾愈後遷華陽丞

太平廣記

仙經可以精思合作仙藥者秦華霍恆青城峨眉之類凡二十八山此皆是正神在其山中或有地仙之人上皆生芝草可以避大兵大難若有道者登

之則山神必助之爲福

抱朴子金丹篇

巴邛人不知姓家有橘園霜後諸橘盡收餘二大橘如三四斗盎巴異之摘
下剖開中有二老叟鬚眉皎然相對象戲談笑自若殊不驚怖相與決賭賭
訖一叟曰君輸我海龍神第七女髮十兩智瓊額黃十二枚紫絹披一副絳
臺山霞實散二庾瀛洲玉塵九斛阿母療髓凝酒四鐘阿母態盈娘子躋虛
龍縞襪八縵後日於王先生青城草堂還我耳

玄怪錄

漢武帝見王母巾笈中有一卷書盛以紫錦囊帝問此書是仙靈方耶可瞻
盼否王母出示之曰此五岳真形圖也昨青城諸仙就吾請求今當過以付
之乃三天太上所出文秘禁重豈汝濁穢所能佩乎

漢武內傳

唐顯慶中有蜀郡青城民采藥青城山下遇一薯藥劇之其根漸大如甕劇
之不已地忽陷十丈餘此人墮中無由出仰視穴口如星分必死矣忽旁見
一穴入之稍大匍匐前視如有明狀尋之而行穴漸高繞穴行可里許乃出

灌縣志

卷十八 摭餘紀

七

洞口口上有水闊數十步岸上有村落人家男女衣服不似今人驚問得來
之由具告所以乃將小舸渡之民告以不食三日矣遂食以胡麻飯柏子湯
留止數日民覺身漸輕問主人此何所兼求還蜀路其人笑曰汝世人不知
仙境至此當是有仙分吾將引汝謁玉皇遂將此人往須臾至一城皆金玉
爲飾至宮門側有大牛赤色閉目吐涎主人令禮拜牛乞仙道如吐物即便
吞之民如言拜乞牛吐一赤珠大徑寸民方欲接忽一赤衣童拾之而去民
續求得青者黃者白者皆有童子奪之民急以手捧牛口須臾得黑珠遽吞
之黑衣童至失望而去主人遂引謁玉皇居殿如王者像旁有七人冠劍列
侍玉女數百玉皇對民具以實對而貪顧左右玉女玉皇曰汝悅此倚衛之
美乎民俯伏請罪玉皇曰汝但勤心妙道自有此等敕左右以玉盤盛仙果
示民曰恣汝以手拱之即所得侍女數也民得三數玉皇敕前主人領往敕

三女充侍給屋居之令諸道侶導以修行洗滌塵念侍女亦授以道術其地草木常如三月中無榮落寒暑之變度經一歲餘忽中夜而歎玉女問之曰吾偶來此耳來時妻產一女纔數月家貧不知若何思往省之女曰君離世已久妻子豈可復尋何塵念未祛生此妄想民曰今僅一歲妻當無恙要明其事耳玉女以告諸鄰相共嗟嘆復白玉皇令遣歸諸仙作藥水上送之三女各遺以黃金云恐至人世求無所得以此爲費中女謂金中有藥取而吞之可以復歸少女曰君家已無處尋惟舍東一擣練石尙在吾將藥置石下如金中不得藥取此服可矣言訖見羣鵠飛過天際衆令民隨鵠而去民亦騰身鵠羣飛至城中下問其地乃臨海縣鬻金爲資經歲乃至蜀時開元末年也問其家無知者有一人年九十餘云吾祖往年采藥不返今九十年矣乃民孫也且云姑叔皆已亡民女適人身歿其孫已五十餘矣舊居皆爲瓦

灌縣志

卷十八 據餘紀

八

礫惟故砧尙存民毀金求藥將吞之忽失所在乃急舉石得玉合有金丹在焉即吞之却記去路民雖得道不能詳其事時羅天師在蜀見民說其去處云是第五洞寶仙九室之天玉皇即天皇大牛乃馱龍也所吐珠赤者吞之壽與天齊青者五萬歲黃者三萬歲白者一萬歲黑者一千歲民吞黑者亦得至千歲玉皇前七人北斗七星也民卻入山不知所之原化記

玉局觀道士趙駕仙上官道士名失住青城山修齋入壇行法其厮僕臥而驚魘問尊師何在人間之曰適見四人著緋自天而下拽二道士於壇前鞭背二十問者止之令勿言比趙駕仙與上官道士相次發背而斃又有何景中作道士威儀好食蒜上壇行法事時有蒜氣後於青城山修齋船覆溺死十國

春秋補遺

青城道士者未詳其姓氏能幻術嘗於僻處作法凡西王母巫山神女及麻

姑鮑姑諸仙姬皆應召而至又忽於城中化出金樓惑衆後主知其妖密使人禽之累月不獲後追及於青城道上以犬豕血沃之下獄考訊自言歷探民間處女恣行容成之術死者無算遂伏誅十國春秋

青城寶園山僧彥先有隱慝離山往蜀州宿於中路天王院暴卒被人追攝詣一官曹未領見王先見判官詰其所犯彥先抵諱之判官乃與以一豬脚彥先受之乃一鏡也照之見己身在鏡中從前愆過猥褻一切歷然彥先慚懼莫知所措判官戒而遣之洎再生徧與人說然不言所犯隱穢之事北夢瑣言

青城縣岷江暴漲漂墊民居縣民關承湍妻計氏有孩提子在懷抱乃上木匱爲駭浪推漾入江惟見赤幘佩刀者洎朱衣乘簡者安存之令泊縣漑乃隨流泛泛至縣漑爲舟子迎拯而出子母皆無恙北夢瑣言廣政十五年夏六月望日蜀後主宴教坊俳優作灌口神隊二龍戰鬥之狀

灌縣志

卷十八 摭餘紀

須臾天地暗昏大雨雹明日灌口奏岷江盛漲鎖孽龍處鐵柱頻撼其夕大水漂城壞延秋門深丈餘溺數千家摧司天監及太廟令宰相范仁恕禱青城觀又遣使往灌口下詔罪已蜀檮杌

蜀朝庚午夏大雨岷江泛漲將壞京江即今灌江堰上夜聞呼噪之聲若千

百人列炬無數大風暴雨火影不滅及明大堰移數百丈堰水入新津江李冰祠中旗幟皆溼導江令黃瓌及鎮靜軍同奏其事是時新嘉眉水害尤多而京江不加溢杜光庭有賀江神移堰牋錄異記又宋開寶五年壬申秋八月

成都大雨岷江暴漲永康軍大堰將壞水入府江百姓憂惶但見驚波怒濤聲如雷吼高十丈以來中流有一巨材隨駭浪下近視乃一大蛇也舉頭橫身截於堰上至夜間呼噪聲列炬縱橫雖大風暴雨火影不滅平旦廣濟王李公祠內旗幟皆濕堰上惟見一面沙隄堰水入新津江口時嘉眉等州漂

溺至甚而府江不溢

茅亭客話

按二說李王靈蹟皆同惟大蛇事稍異光庭所書

在唐天祐庚午與開寶壬申相距六十二年以賀牋考之光庭自當不妄休

復謹得諸傳聞而先後符合豈果神異兩著耶抑或耳食之誤耶記

趙昂不知何時人嘗爲捕役奉票宿被告家與雞作別主人果欲殺雞食昂

昂止之潛入青城山從會昌建福學道得黑虎爲徒常騎之行會昌爲羣仙

領袖令昂主峨眉昂遂爲是山之神

蜀中名勝紀

皇甫士安青城記云前爲青城後爲大面其下東北有太華玉真高城朝紀

九超三極開元雲元等洞上帝以五岳仙衆劉景迴等主之

近時有都下士人許姓能迎致大仙所言多奇中嘉定壬午春三山黃公朴

同一二朋友訪許叩功名大略即書沙門光遠降先自作贊云伸脚自由屈

脚自在不知十二部尊經不識三千條大誠醉後高歌無障無礙當時若見

灌縣志

卷十八

撫餘紀

十

闔王任他枷鎖扭械後再書云黃子黃子文魁多士醞藉胸中十萬兵縱橫
筆下三千字無垢爲朋汪公相似若得火土相逢一躍禹門裏浪後八年歲
在己丑黃果大魁天下黃生丙子魁於己丑實符火土相逢之句狀元局諸
公唱和詩有醞藉一聯不差一字鬼物已先知之矣光遠昔時雲遊入蜀至
青城山丈人觀不爲道士所禮僞爲繡衣出巡盡黥觀中向來不禮之人南
僧不許入蜀者以此距今百餘年尙爲黥鬼可謂異事

游宦紀聞

完顏亮每一舉事必決於大仙紹興辛巳之舉挂巨筆令童男童女各一侍
於旁以求詩詞得望江南一首云纔舉意元象照離宮坎女離男金水火幾
多鐵騎漫英雄最苦雲中遼陽驚起老蒼龍四海九州沾惠澤狼煙影裏弄
清風想作主人公亮覽之不悅問汝爲誰乃書清源真君四字蓋灌口神王

也

夷堅志

宋紹興末呂洞賓赴青城鶴會憩一賣餅果家人不識也呂濃墨大書於門曰但患去針心真銅水換金鬢邊無白髮駭馬去難尋蓋寓呂洞賓來四字取刀削之深透木背士人關雲祚繪其象乃一清癯道人也是後餅果大售

前志

顯英王殿前石牌坊明隆慶間豎清康熙四十八年六月神誕前數日衆議演劇嫌其障蔽禱於神欲徙之數百人牽挽不能動二十一日夜分雷雨交作聞者驚起電光中見牌坊倏忽分置東西蓋神力也衆皆走集觀之

前志

由灌陽軍溯龍溪百里源窮嶺斷境益幽絕人跡罕到王氏世居之一日有僧乞食假寐駒駒有聲王出見龍蟠睡訝之既而求一袈裟地乃展衣覆其處後募工匠築室忽陷爲池木葉入水卽有飛鳥銜去僧以接骨方遺王氏良驗至今成都禱雨至潭乞水則雨隨至名其池曰滋茂

前志灌記

灌縣志

卷十八

撫餘紀

十一

清康熙丙戌秋孟洞溝有二物如牛相鬥山爲之崩橫截谷口水不得流者三載瀾漫浸淹逆上數十里官民時驚恐戊子威保近岸居民夢神告以大水將至可速避轉相走告一時遷者數十家未幾淤決水發威保域郭皆沒水至灌口尙湧起三四十丈洪濤巨浪中見有人騎白馬指揮所漂木石壅塞離堆堰口水遂趨外江東南下不復北流成都諸堰得以無害

灌記

遇仙巖在龍居岡濃翠迷天瀑布飛灑相傳清初有道士入山采藥時大亂初平榛莽荒穢日暝迷路望巖上隱有燈光就之茅屋數椽見叟三人告所苦叟煨芋食之芋甚巨啖餘置懷中與言不答倦倚壁眠醒則人舍俱渺視懷芋石也始驚所遇爲仙云

青城行紀

其西集仙橋在常道觀前蒼崖下覆泉溜飛滴瓦間瓏瑋作響嵐翠四合最爲勝地古老相傳昔有仙人在此聯句故

橋得斯名

青城山記補正

白馬堰溝沿山數十里皆以人力鑿成相傳開至余家壩土忽下陷有巨魚
冲霄飛去今李氏宅後陷狀宛然堪輿家以爲風水由此壞驗之人事開堰
諸家皆式微儻或然歟采新

崇佛寺牆東舊有泉方廣約五丈餘終歲澄澈相傳獻賊禍川時寇兵至此
馬渴甚用蹄抉出泉水云采新

石羊場古竹瓦鎮也今名不知其朔惟場內溪畔舊有石羊二一完好一臂
後受傷成凹狀相傳有一羊乘夜竊食田禾被石擊所致嗣居民移菜市於
此謂供羊食田禾乃不受害又治東官道有石馬巷傳說亦類此而馬不存

焉采新

清同治十三年山匪將亂有李三少者於居民袁文登家召魂叩以生平歷
言不爽又能使几作馬叱之卽走懷木童一有所作則附耳問之吉凶多驗

灌縣志

卷十八 撫餘紀

十二

後匪皆伏誅李竟漏網采新

清光緒中石羊場有宋姓者於牆內掘池未幾忽狂亂握刃若尋仇者鄰相
驚曰宋某至矣則皆走家人亦避之後竟殺其妻旬餘始悞不知觸何邪也
又金馬鄉有徐姓者毀棄古墓其子忽發狂持斧碎父首有司擒而誅之采新
雙瓦房者地屬中興鄉清光緒庚寅頻遭回祿居民惶懼一夕數驚甚有移
什物而結茅暫處者亦不免焉相與謀諸巫巫來則巨石立至乃設壇神以
鎮之火乃漸滅是亦妖由人興歟又崇義場東有陳姓者爲小神所祟或竊
其物或穢其食或裸其雞或石置懷中或刃行屋上驅之無效閱年餘始已

采新

中興場西近山麓光緒間民居偶於此掘土得丸數十粒驚爲神賜用以治
病輒有效未幾遠近傳聞來掘者衆且掘有定時遲早皆不可得數月乃無

聞

采新

麻溪陳秀孚有別墅在望江臺清光緒二十二年夏工人王三墾地得一物似鋤非鋤携歸藏之是夜拋甄擲石達旦始休次夜復然疑爲盜邀鄉人執械以伺拋擲益甚不見形影且窗櫺不過寸許而甄石能穿入如是者數夕工人倦臥忽呼救衆驚視之身已青腫云有戎服者攝見主人責以盜物盛怒鞭之一老人爲緩頰令將物還伊乃見釋因如所言患遂息瘞時有苟鐵匠者疑爲金寶竊歸治之乃鐵也鑄爲刀甚利未幾以刀故殺人論死刃以凶器藏庫焉

采新

安瀾局穀王廟有趙昱鐵像相傳清初有樵者入大面山一老父倩其負至韓家壩嗣有虎患鄉人逐虎見神像因舁至廟座鑄時代地址廟有碑可考

采新

灌縣志

卷十八 撫餘紀

十三

老君岩初爲石壁人跡罕到明末有王楊二老同夢道士邀至石室款之旬夕復然相與覓其處見岩間斑駁宛然老子像也乃集資建廟住持者爲朱成亮何先達邱元光三道士皆有異蹟

采新

縣南涵水溝有鍋底沱相傳係海眼深不可測清同治間王姓用繩繫石測之繩盡數十丈無止境越數日繩石浮出人或以石投沱風雨立至禾苗受損民國初有人在上游建磨久雨不止衆折毀之乃晴霽因稟官示禁立龍王廟於沱上

采新

金鞭崖在青城山陰自下望之有洞寬一二尺深尺許內豎赤條三日光照之金色爛然清咸豐間鄉人楊氏以槍擊之一斜未墮後楊氏墜崖死又有以繩束腰自崖上懸至洞欲鉤取之繩斷墜斃光緒十八年四月太平場有黃姓售藥者其子採薪至崖似覺有路卽上正其斜條而取洞中朽木懷

之忽聞雷震鄉人驚視趨至其木色黑衆分取之時駐防把總官青雲亦往分少許訖無所用黃子年僅十三復至崖處則不能上矣新采

清時邑中有巫者降神大書云煬帝宮前草秋來不復青苑中螢百萬散作兩餘星不解所謂問神爲誰則赤城王趙昱也新采

清光緒間有劉輔臣者忽遇王玉絹仙子邀至其家讀書云家在甕頂峯師友留之不得因贈以詩李蕃邑附生詩有我欲送君瑤島上恨無羽翼到名山

句楊蔭軒詩有青城六六峰猶在知住白雲縹緲間句蕃贈絹有前度劉郎今日遇猶疑郎貌認非真句絹詩有輔臣劉子尙無家負笈來從灌水涯可堪洞府神仙質不羨人間富貴花句詩多不具錄也劉數年始歸夜能辨字驗之不爽爲人寡言必親友問之乃爲道其一二云新采青城金鞭崖壁立千仞中空如屋晴明望之有排立若小柱者三光耀奪目

灌縣志

卷十八

撫餘紀

十四

相傳明慶符王爲賊所逼插鞭於中墜崖死清咸豐初土人以烏槍擊之一鞭遂斜光緒三十三年有黃氏子採薪於山不知緣何得上山人驚而噪之倉皇下其鞭竟不復斜黃云有老人引使上金鞭堅不能拔側多木鞭方取其一聞呼急下衆視之鞭已朽後亦無他異新采

清宣統三年夏秋之交興仁場山麓有聲如牛鳴時陰雨如晦溼霧橫江或以爲水災之兆云新采

灌東金馬鄉法華寺側田中有古墓民國十二年甲子八月墓中忽作金石聲晝鳴夜息好事者蕪草於上亦不止旬餘乃無聞新采

民國十四年夏五月天大雷電以風興仁場彭姓家忽來一姝光豔照人入寢參神像一家駭異須臾風靜雷息飄然竟去或謂狐避雷劫云先是城西王廟經樓獲狐子道士因得狂疾又城內江西館有狐能詈人而月且不爽

聞者赧然新采

傳曰物反常為妖然反常亦自可貴和氣所召厲氣所鍾孰令致之蓋物不自異而人異之也夫造物好奇往往有出乎恆情之外者人所罕見輒詫之抑知人不自異物何由異不異乎人之異而徒異乎物之異是蔽於眉睫而未察其所從來也若必真以為異不且為博物君子所笑哉

張騫尋河源得高節竹產於邛山是名邛竹蜀記按即今之拐杖竹也灌西北山中多有之

左思蜀都賦交讓所植蹲鴟所伏李善注云交讓木名兩樹對生一樹枯則一樹生如是歲更終不俱生俱枯也出岷山在都安縣蹲鴟大芋也其形類蹲鴟故卓王孫曰吾聞岷山下沃野有蹲鴟至死不飢

晉咸康中江源生異草高七八尺莖葉赤子青如羊角內史耿騰以為朱草

灌縣志

卷十八 撫餘紀

十五

表瑞於成都王華陽國志

綠萸丹椒風連藤蕪俱見蜀都賦李善注云綠萸即辛夷藤蕪出岷山替陵風連出岷山一曰出廣都山岷山特多藥草其椒尤好異於天下

青城產天師栗似栗而小獨房者為異久食治風攣相傳張道陵手植十七株在上清宮益部方物記

范仙觀萸芝樹高丈餘花小而白每歲開花次年結子又次年方熟子如楮實文若龜背味甘酸可食雲谷雜抄

宋太平興國三年青城縣民家竹一本上分雙莖宋史五行志

瑞聖花出青城山中幹不條高者尋丈花率秋開四出與桃花類然數十跗共為一花繁密若綴先後相繼而開九閱月未萎也蜀人號豐瑞花故相國程琳為益之年繪圖以獻更號瑞聖花然有數種小者號寶仙淺紅者為醉

太平白者名玉真成都人競移蔣院中以爲尤玩益部方宋祁嘗贊之詳文

有草生青城眉山葉似萱草其背有點雙行相偶黃澤類金星人號金星草

亦金釧草皆以肖似取之醫家以傳疽甚良益部方宋祁有贊詳文

杜光庭居恆持驕龍杖一條紅如猩肉重若玉石絕非藤竹所爲相傳遇仙

人留賜又有左宮枕青玉爲之體方平長可寢二人冬溫夏涼醉者破醒夢

者遊仙云是左宮夫人所授光庭進之蜀主十國春秋

于生名玄成都人其父孟蜀進士嘗遊青城歸泛舟百花潭買雙鯉長尺餘

烹食之其遺骨黑如鐵召匠鑄成一刀於昏黑中視之光芒丈餘于甚寶之

李順之亂于陷賊憂憤而卒刀不知所在茅亭客話

桃竹葉如櫻身如竹密節而實中犀理瘦骨蓋天成拄杖出巴渝間子美有

桃竹杖歌蓋古靈壽杖也見東坡題跋令邑人園中多有之又龍頭竹根幹如龍老

灌縣志

卷十八 撫餘紀

十六

人以之爲杖質亦堅新采

孟蜀廣政十二年十月召宴芳林園賞紅梔子花花乃青城山進子所種清

香如梅陸放翁有紅梔子花賦蜀檉青城山記補正云王衍咸康元年冬亦

有賞紅梔事是種不始孟昶也

宋淳化癸亥年冬十月青城山民往趙公山採藥遇數苗藥頗大於常村

人度其下必有大薯藥遂與妻子同掘之深三尺餘但見根鬚抱一大盜合

遂揭視之有大赤蛇如爛錦盤結合內村人悸慄以鋤觸之蛇乃翻然化一

雉飛入溪水中合內餘一石簪村人持歸山舍其夜一室如晝村人轉懼此

物異常送與莊主明年李順之亂遂不知此簪所存茅亭客話

青城縣漁者釣歸傾魚竹器中有一魚化爲石長四寸許鱗鬣燦然若活置

石魚水中則搖鬣振鱗漁者驚異取出置木盥中鄰里求觀者衆在水則活

離水則石率以爲常

前志

老人村有白鹿頂山上時見白鹿蓋千百年物也山之餘脈結爲黃龍岡上有菊花井井旁生草莖赤而汁如猩血餌者多壽郭莊詩駐世何須丹藥仙風吹長靈芽蓋謂是也老人郭鴻儒有記

青城行記

青城諸觀銀杏樹皆千百年物惟上清實獨無心道士收之以備旨蓄亦異

物也

青城山記補正

漩口鄉白雲峯石洞有柏一株藤蔓下垂花紫色圓如球大於匏甚美觀者老多及見之名曰仙花歲有多寡土人用以卜豐歉

前志

櫻樹直幹無枝青城天師洞有櫻一株高丈許處即分兩歧成對峙形人皆

異之

新采

青城山有草葉間開黃花結朱實土人名曰葉上球又有草蔓生結實如梨

灌縣志

卷十八 撫餘紀

十七

而小微有黃毛或謂之金絲梨道士取以釀酒不需麴而能溶化味甘可飲

新采

清光緒癸巳夏四月金馬鄉某甲園林內有蛇以百數其形或仰或俯或動

或靜或盤結成團交頸相倚經宿乃散或曰蛇會

新采

中興場江岸有杉一株高丈餘處即有橫枝倒插復直上與正幹成對峙形高大且過之其旁又一枝倒插尺許復直上與正幹成排立形惟高大不敵中枝耳

新采

清咸豐九年灌城真武宮牡丹忽花衆異之陳政恆賦詩云羣芳領袖見威儀底事開逢九月期縱有黃花同馥郁卻無綠葉與扶持懷才不恃青君寵得氣先邀白帝知可惜凌寒難耐久天然富貴出非時

新采

光緒二十二年太平場民婦李劉氏割芻於野見小母犬抱歸戲哺以乳已

而鄰婦楊馬氏乞畜之李子買一病豕治之愈產小豕六母豕旋斃適犬亦產子乳子後每來李家乳其豕人皆異而歎之采新

光緒中葉大面山人有懸二蛇於竹竿者持至市中長各尺餘一色紅一色黝其死狀係此蛇之頭鑽入彼蛇之口云采新

興仁場南之八角井中有魚如鯉祈雨者多則井旁數里恆苦雨土人乃堙之某年旱甚鄉民羣往淘井獲一石如魚長二尺許今井如故而魚不復游

矣

采新

馬祖寺牆西蕭家巷有隙地焉每年正月上九日遊人恆於此抉出霉黑米數粒或至十餘粒前後一日均不得土人呼爲黑米坪采新

邑人賈思徽種荷於盆一莖雙花因宴集賓朋各有題詠並請於有司改縣治武聖街爲瑞蓮街刻石紀之以彰厥異采新

灌縣志

卷十八 據餘紀

十八

民國六年丁巳秋七月寨子坪有聲出谷中土人異之尋聲掘土見石梁長數丈類似龍脊復掩之後亦無恙采新

灌東陳氏世讀書清縣令周椿園爲作七橋公家傳武郡山人計恬爲作青城義士歌家有雌雞一色黃曉山母劉氏所畜也追隨几杖不稍離劉卒家人舉哀雞亦悲鳴不飲啄生七卵薦簋前毛羽忽白曉山囑家人善視之暨大祥而色如故已而頭忽白曉山從子卒計恬客於其家驚異之爲撰義雞記而家人則呼爲孝雞云采新

民國十三年甲子金馬鄉民宅火汲井水救之若有魚躍聲猝不及視明日至井邊察之則魚已死長數寸狀如草履口銳而尾短不得其名異而投諸

河

采新

民國十四年乙丑春李不花已而葉盛枝上結實銳角而長不踰寸其數甚

夥云新采古異物

孔子曰天子失官學在四夷又曰禮失而求諸野司馬遷亦言長老所稱黃帝堯舜之處風氣固殊總之不離古文者近是知人事蕃變類有不詳者焉蜀白人皇開國多歷年所灌隸蜀疆文化夙著其間之逸士隱流家藏秘錄見聞未及不乏遺亡羅而致之並足珍也以爲嗜痂則過矣

黃帝封青城爲五岳丈人一月之內羣岳往朝焉乃嶽瀆上司諸仙崇秩天下有三十六洞此其第五又有七十二小洞以應七十二候八大洞以象八

節云玉置經青城甲記

李冰謂汶山爲天彭門李膺謂爲天彭關以兩山對峙如關故名治水王漁洋詩秋水下彭門而明統志以彭縣彭門山爲天彭關水經注云在氏道縣西北蓋彭與氏道皆岷山支阜所盤鬱天彭所在各有所指以其接壤故也

灌縣志

卷十八 撫餘紀

十九

按汶同岷史記蜀王本紀輿地廣記並作汶山

禹貢岷山導江東別爲沱郭璞爾雅音義沱水自都安瀕堰與江別而東流史記李冰穿二江成都中沱之名見於禹貢則非鑿於冰可知蓋江之別流在梁者通謂之沱詩云江有沱是也冰特沿禹蹟疏之二江又皆沱之支流蓋卽今北條走馬兩河夾錦城南北而合於東關外下至江口仍匯岷江其正流則至犍縣始入江是卽禹貢之沱水也

神仙傳云張道陵入蜀居鳴鶴山著道書而不及鶴鳴山魏志則云道陵學道鳴山而不及青城考道陵遺事青城較多是鳴鶴之說爲不妄郡邑考又云灌縣梁改置齊基郡齊基縣隋改青城縣有鳴鶴山是鳴鶴乃青城之一支特不可指名耳

天國山在縣西有融照寺

明統志

今廢按升菴集青城一名天谷今作天國非

又山海經西南黑水之間有廣都之野郭璞注其城方三百里蓋天下之中
素女所出補注云此璞以異聞增入之也黑水廣都今之成都素女在青城
天谷今名玉女洞是天谷即青城矣記灌
李冰水則深淘灘今皆如字讀考梅誕生字彙灘音他案切證以爾雅歲在
申曰涪灘然淘灘今亦如字讀惟楊升菴丹鉛錄辨此字有二音謂據鄭氏
說文灘即詩嘆其乾矣之嘆字正與下低作堰相叶李守定此六字附於古
謠諺其義不爽如字讀失之矣又云在河爲磧在江爲灘皆積石之堆壅者
古今淘灘祇去其塞益信冰之神鑑無極也升菴復言六字出大禹神圖經
曰深淘灘低包隔其疏江亭詩有作堰淘灘是禹神句即指此特包鄆作堰
略異耳

漢江原縣在今崇慶縣江原場水經注謂江水逕江原縣鄴水出焉今羊馬

灌縣志

卷十八 撫餘紀

二十一

河由廢縣經過下會於三江口李雄僭號置漢原郡縣於懷遠鎮江原遂廢
晉復漢原爲江原名雖復而地不同歷宋齊仍江原名不革唐武德初於廢
江源縣置唐隆長壽二年爲武隆先天元年爲唐安至德二年爲唐興宋開
寶中復爲江原元併入崇慶州明玉珍復置洪武又省前志所載宋江原人
物如張公邵張公裕張公謹張中理樊廣漢胡晉臣張深殆皆崇慶州人特
誌疑於此又宋李謨實華陽人見華陽縣志明王璫實遂寧人見遂寧縣志
因璫號青城山人故誤採入且謂璫是青城人而明實無青城縣是不可不
辨也

譙秀蜀記載蜀之八仙首容成公云即鬼容區隱於鴻濛今青城山也次李
耳生於蜀今之青羊宮三曰董仲舒亦青城山隱者非天人三策之董仲舒
也四曰張道陵今大邑鶴鳴觀五曰嚴君平卜肆在成都六曰李八百龍門

洞在新都七日范長生在青城山八日爾朱先生在雅州

見升菴集

又潛確類書

云大面山七十二福地之一也羅真人所居

峨眉山志升菴集

司馬相如墓相傳在邑東劉海壩前志載之蓋本元和志按史記本傳相如既病免家居茂陵武帝使所忠往取其書至則已死是相如歿於關中墓不應在此即櫬返蜀亦當葬成都今邑人擬建相如祠殊過信矣民國八年已卜地城南道士有出貲者嗣因財絀而止王昌麟撰有記云

觀坂在灌口蜀漢建興十四年後主幸湔山登坂觀汶川之流

元和志裴松之

蜀志注湔縣名按漢書地理志後漢書郡國志均無湔縣不知所本汶川卽岷江汶乃岷之假借或謂觀坂卽鬪雞臺舊有漢碑俗名阿斗碑今佚

大面山一曰趙公山以趙昱得名嘉定名宦志云趙昱青城山人與道士李珣游累辭薦辟徵煬帝徵爲嘉州太守時州有蛟爲昱令民募船數百艘率

灌縣志

卷十八

撫餘紀

二十一

千餘人臨江鼓噪自被髮仗劍入水有七人隨之天地晦冥少頃雲霧斂收七人不復出惟昱持劍提蛟首奮波而出水盡赤蛟害遂除已而挈家入山縱跡不復見唐太宗封爲神勇大將軍廟祀灌口明皇幸蜀進封赤城王宋張詠治蜀亂禱祀得神助事聞封川主清源妙道真君今所祀川主者趙昱也

華陽國志云汶山郡會無縣有天馬日行千里馬死於蜀葬江源小亭今天馬冢是也小亭有好稻田東方常氏爲大姓文井江上有守捉三十里上有天馬祠按水經注都安縣瀆文井江上有卓氏堤四十里有朱亭亭南有清城山都安蜀漢置卽今縣地其界或接崇慶之文井江而天馬冢則在大邑俗名馬王墳蓋灌與崇大在漢均爲江源地故常氏云然小亭當爲朱亭之誤漢無守捉作卓氏爲是

江源文獻錄崇慶縣志

鍾玩良吏傳云崔瑗爲灌令開溝耕田民賴其利歌曰天降神明君錫我仁
慈父臨民有德澤恩惠施以序穿溝廣溉灌決渠作甘雨按漢無灌縣後漢
書崔瑗傳瑗爲汲令開稻田數百頃百姓歌之灌令當是汲令之譌鍾氏謬
前志載入藝文誤矣

董道書馬嵬圖後云在蜀所見書有青城山錄記明皇念貴妃命方士求神
冥漠與楊通幽事略同惟云其人爲廣漢陳什邡上元仙女爲張太真又云
青城山錄道家用補科儀中亦異聞也廣川書錄

神僧傳云青城有異僧出入井中赴供長安頃刻復還廣明中乃賜名飛赴
寺輿地勝覽謂舊名昌聖乃唐左軍容使嚴遵美捨宅有四望亭按飛赴之
名見玄宗勅必非廣明賜名寺或中廢遵美嘗捨益之亦未可定也青城山記補正
青城甲記云丈人觀前有靈燈齋日必見或五或六亦無定數玄宗勅道士

灌縣志

卷十八

摭餘紀

二十二

王仙卿黃帝壇修醮其鏡徧山僖宗幸蜀之年山中修靈寶道場周天大醮
神鏡千餘輝灼林表

宋大明中道士楊超遠秀才費元規亦居此山

青城山甲記

李德裕黃治賦序蜀道

有青城峨眉皆隱淪所託不信然歟

青城山記補正

裴迪嘗從王縉游劍外四川通志稱迪爲導江令不見所出疑莫能詳也

崇慶

州志

寶園山在青城縣北三十里岷山之東洞在其下以其靈芝產玉神草繁金
故以爲名

唐中和元年七月十五日詔內臣袁易簡刺史王茲縣令崔正規與朕詣青
城修醮封爲五岳丈人希夷真君是時縣界亢旱苗穀將焦封醮之後龍吟
於觀側谷中風雨大至枯苗再茂縣境乃豐

雲笈七籤

玉局觀洞高駢帥蜀時取罪人以繩絆其腰令探淺深繩兩月方絕出青城

洞天觀門續博物志

寰宇記味江源出青城縣西長樂山下江中有石高數丈者名大坎次者名小坎水激其上聲聞數里相傳水味甘美人爭飲之故名一云蜀王征西番適有野人以壺漿獻王投之江中使三軍飲之皆醉故曰味江

唐詩紀事唐求居味江山人謂之唐隱居後即宅為隱居寺在孟蜀未置永康縣前其地為青城縣境求所居味江山蓋今崇灌接壤處也民國四年夏六月大雨坡圯崇屬街子場農人見露甕閃爍有光驚而囊歸中多銀器厥狀奇古因燬之所餘無幾識者歎惜殆當日供佛所遺者與崇慶縣志寶幢院記在青城海宴寺又有改海宴寺碑疑海宴寺即古寶幢院至僖宗中和間更名耳特碑已無存不能詳覈永康軍碑目考

灌縣志

卷十八 撫餘紀

二十三

楊慎云唐世蜀之詩人射洪陳子昂彰明李白成都李餘雍陶阮咸朱桃椎劉灣岑倫符載雍裕之扈處辰王文錫綿州王嚴劉暎季渥田章雙流柳霍巴州張曙丹稜僧可開青城杜光庭若張蠡韋莊歐陽炯皆流寓而老於蜀者常欲哀其詩為一卷而未暇焉丹鉛總錄或謂光庭縉雲人從僖宗入蜀恐非

詩亦未有專集惟省志中載有數首前志亦錄之詳文

廣政十三年孟昶第三子元寶卒年七歲幼而奇異既齠誦詩書萬言昶悲悼不已下詔封為遂王贈青城大都督蜀檇

吳船錄長生觀范長生得道處也有孫太古畫龍虎二君在殿外兩壁上筆勢揮掃雲煙飛動蓋孫壁之尤奇者殿壁又有孫畫味江龍一堵相傳孫欲畫龍而不得其真有丈夫過云君欲識真龍乎忽變而天矯孫諦視畫得之視稍久一日遂昏即此畫也舊壁宣和中取入京師臨行道士募名筆摹於

新壁名勝記觀有古柵高數十尋圍三十尺世傳范長生手植胡叔豹詩更
劇盤根藏大藥也令嘉樹得長生卽此唐明皇登青城山於長生觀駐輦故

明統志謂觀爲玄宗別殿

青城山記補正

王衍與太后太妃同遊青城山宮人衣服皆畫雲霞飄然望之若仙衍自製
甘州曲述其仙狀上下山谷衍嘗自歌使宮人和之

新五代史

唐相國孫渥謫居衡山嘗乘輅至蜀詣杜光庭受籙乃曰常遇異人話及時
事每有高樓之約爾後雖居宰輔竟出官於南岳有詩寄光庭云蜀國雖難
返鄉心更益愁我行同范蠡師舉效浮邱他日相逢處多應在十洲惜未錄
其全章後白馬驛之禍孫竟免焉

北夢瑣言

花蕊夫人蜀王建宮嬪卽後號小徐妃者大徐妃生王衍而小徐妃其女弟
唐莊宗平蜀二徐遭害於秦川驛及孟氏再有蜀傳至昶則又有花蕊夫人

灌縣志

卷十八

撫餘紀

二十四

作宮詞者是也後隨昶歸中國被召入宮而昶遂死昌陵亦惑之屢爲患不

遂一日從上獵苑中晉邸射殺之是蜀有兩花蕊夫人皆國亡身死

鐵關山叢談按

二徐爲徐耕女孟蜀妃爲徐璋女皆青城人史言小徐妃生衍不言晉邸射
殺夫人也又乾隆灌縣志云夫人爲蜀王孟昶妃昶降宋妃賦詩自縊

花蕊夫人宮詞舊本百首蜀亡無傳者宋熙寧間王安國始傳於世祇三十
二首安國有跋云熙寧五年奉詔定蜀楚秦三家所獻書可入三館者令
使李希顏料理之其書多剝落得一敝紙所書花蕊夫人詞三十六首乃夫
人親筆而詞甚奇與王建無異建詞自唐至今誦者不絕口而此獨遺棄前
受詔定三家書者又斥去之甚可惜也臣謹令使郭祥祚繕寫入三館而
歸口誦數篇於丞相明日安石在中書語及王珪馮京願傳其本於是盛行
夫人僞蜀孟昶侍人事具國史臣安國謹題湘山野錄云文瑩親於平甫處

得副本王恭簡續成都集記纔二十八首缺後四首鐵圍山叢談云宮詞百首別本有全載者茗溪漁隱云花蕊逸詩六十六篇近有好事者搜索而續之劉貢父中山詩話云夫人號能詩而世不傳平甫因治館中廢書得一軸八九十首而存者纔三十餘篇大約似王建句東坡亦云詔定三家書夫人宮詞獨斥不許其詞與王建無異又云當去古之時而能振大雅餘韻沒其傳不可也因錄其尤者刻諸石是夫人詩固全平甫謹存三十餘首東坡亦書所盛傳者耳逸詩之出非妄舊志節錄十數首然才難之歎千古同情茲就升菴藝文志所載原詩及逸詩隸入文徵以備稽考

孟蜀廣政十五年青城縣鬼城山崩暴水大至忽見東有數峯崖澗中多石版篆文凡六七處人多不識或云是蒲仙上昇之所

十國春秋

景煥卜築青城山下曾造墨五十團印文曰香壁陰篆曰副墨子

焦氏類林

灌縣志

卷十八 撫餘紀 一二十五

天師洞南有偏橋即古龍橋循橋而南約三里許為祖師殿輿地紀勝清都觀在延慶觀上三里一名洞天觀唐道士薛昌浴丹井杜光庭墓俱在觀後宋張愈隱居是間其下白雲溪出焉所謂白雲隱居也任京易詩懶隨六詔上丹關高臥一峯藏白雲少愚自題云欲作外臣誰是友白雲孤鶴在巖扉以地考之今之祖師殿意即當日之清都觀地再南為儲福宮今廢青城山記補正清波雜誌云文潞公帥蜀有飛語至朝廷遣御史何郊因謁告俾伺察之潞公為之動詢幕客孰與御史密得張愈使迎於漢州携營妓王宮花者往偽作家姬舞以佐酒御史醉中取其領巾題詩曰按徹梁州更六么西臺御史惜妖嬈從今換作王宮柳舞盡東風萬萬條比何至成都此妓出迎遂不復措手而歸方輿勝覽亦紀其事惟王宮花作楊臺柳首句為蜀國佳人號細腰何郊作何炎詩則張愈所題與此小異何字聖從亦蜀人張則栖於青城

山潞公所敬重者也

宋真宗大中祥符二年十月詔天下置天慶觀先是以正月三日爲天慶節

故有是詔

玉海

范鎮入蜀游岷山過太平院紀行於寺之經閣上云熙寧八年三月游青城間四日趨峨眉俱過此與百世相見百朋百嘉侍行方輿勝覽青城名勝達官多游之不自近時始矣

成都蠶市好事者凌晨而往忽有遇神仙或有遇靈藥及奇物者耆艾相傳

青城山人隱士多因蠶市接救人爾

茅亭客話

永康軍城外崇德廟祀李冰父子冰於秦時守蜀有龍爲孽捕之且鑿崖中斷分江水入永康鎖孽龍於離堆下民至今德之祠祭甚盛每歲用羊四萬餘頭凡買羊以祭偶產羔者亦不敢留永康籍羊稅以充郡計江鄉人亦祠

灌縣志

卷十八 撫餘紀

二十六

之號曰灌口二郎每祭但烹一羶不設他物蓋有自也

蜀醒雜志

胡元質牡丹譜自青城長坪捫蘿而上由鳥道三十里許乃金華葦前有平阜樹高蔽天花開桃紅色莢葉十四五瓣狀若芙蓉香似牡丹春深花先長後發葉謂之枯枝牡丹譙天授李太素二先生隱居其中范致能詩千丈牡丹如錦蓋人間姚魏敢爭先世傳三十年其花方一開

虞雍公自渠州守召至行在憩北郭外接待院因道中冒暑得疾瀉痢連日重九日夢至一處類神仙居一人被服如仙官延坐視壁間有韻語藥方云暑毒在脾溼氣連脚不泄則痢不痢則瘡獨鍊雄黃蒸餅和藥甘草作湯服之安樂別法治之醫家大錯如方服之遂愈世南在蜀中徧訪林下人求獨鍊法鮮有能者忽一日得青城山道友傳授云丹經謂捉得龍伏得雄言雄黃見火則飛走爲煙燄最難伏也其法用雄黃不拘多少甘鍋內煨令通紅

取出攪雄黃入燄硝內急用桃枝攪轉卽成水矣急傾出瓦碟內微側碟子則清者一邊去粗者研細以宿蒸餅爲丸如菉豆大每服三丸至七丸如前法雄黃一兩大約燄硝一錢此丹竈家秘法

游宦紀聞

吳船錄丈人峯下五峰峻峙如屏觀之臺殿上至巖腹自唐以來號丈人爲儲福定命真君本朝增崇祀典灣廬皆有定名此獨號觀先是其徒以爲言予爲請之朝李熹仁父適爲禮官上議曰河圖括地象岷山之精上應井絡帝以會昌神以建福注曰昌卽慶也青城實岷山第一峯會慶又符誕節之名乃賜名會慶建福宮予將入山而勅書適至乃作醮以謝又云今春病幾殆僅得更生因表名山禳祭道十夜就殿前作步虛儀有大炬出殿後巖上色洞赤周旋山頂有頃變滅同遊者疾趨來觀則無有矣予默請於丈人此證正爲予出者當復見使諸人共觀之語脫口復出分合眩轉若經藏然食

灌縣志

卷十八 撫餘紀

二十七

頃乃滅人云從來此峯無證數年前曾一見

青城山中有六道宮丈人觀上清宮爲最餘皆在山麓五里至上清宮又至成都山則爲半山至大面山則爲山巔大面山之後卽老人村不可通矣

乾隆

灌縣志按村卽今漩口鄉益西則遠達金川與昔日殊

岷山之南青城山之北有平阜一如秦人之桃園昔人避難其中多享年壽故名老人村或云潛夫張不羣入山采藥浹旬不返見一老叟敬而問之叟曰吾族本丞相范賢之裔知李雄僭祚不永挈吾輩至此終焉

東坡集方輿勝覽

蜀青城山老人村有五世孫者甚衆道極險遠生不食鹽醢而溪中多枸杞根盤如龍蛇飲其水故壽本草圖經云卽老澤也

東坡集

按水磨溝亦名壽江

義本此

青城老人村平時無人至其處關壽卿與同志七八人往遊未到二十里日

勢薄晚鳥鳴猿悲境界凄勵同行相顧塵埃之念如掃策杖徐進久之山月稍出山花撲鼻諦視之滿山皆牡丹也幾二更乃得一民家老人猶未睡見客至欣然延入布葦席而坐客謝曰中夜爲不速之客庖厨尙遠無所得食願從翁借一餐明當償值耳翁曰幸不糲食見鄙敢論值乎少頃設麥飯菜羹揖客坐翁獨據榻俄出一物如小兒狀衆莫敢下箸獨壽卿擘食少許翁曰吾儲此味六十年資以待老今不敢愛而皆不顧何取而盡食之蓋松下人蓐也明日導往旁舍皆爭相延饌曰茲地無租稅吾輩斷山爲壟僅可播種以贍伏臘縣吏不到門或經年無人跡諸賢何惠然臨之留三日始出彼中所見百餘人其少者亦龐眉白髮略無兒曹近歲漸通能致五味而壽亦衰夷堅內志今屬滋茂鄉

馮伉離堆山伏龍觀記有仙亭峙其右句是離堆舊已有亭范成大懷古亭

灌縣志

卷十八

撫餘紀

二十八

詩殆指此得毋即今之觀瀾亭明始更其名耶抑離堆尙別有亭耶灌記

輿地紀勝云花洲在軍城南有美功堂發川堂觀物亭濯清亭魏了翁爲之記王子俊爲之賦據此則今縣城卽宋永康軍遺址惟堂亭則渺無存者矣勾龍如淵字行父導江人政和八年登上舍第浮沈州縣二十年以張浚薦召試館職除秘書省校書郎歷祠部員外郎兼禮部起居舍人紹興六年兼給事中同知貢舉除中書舍人兼侍讀並植學士院命草趙鼎罷相制如淵言陛下旣罷鼎則進用人才須聳動四方速召君子顯黜小人帝曰君子謂誰淵曰孫近李光小人謂誰曰呂本中蓋帝欲用如淵爲詞臣趙鼎薦呂本中故憾之又言朝廷事非君臣情通未易能濟每有君臣之間動相疑間不能久於其位者願陛下明諭之時秦檜方得君如淵恐上委檜未專故及之又嘗爲檜謀曰相公爲天下大計而邪說橫起盍不擇人爲臺諫使盡擊去

則相公之事遂矣檜大喜擢如淵中司金使來議和許歸河北地使者倨甚
議受書禮不決外議洵洵如淵建議取其書納禁中於是同諫長請對又問
吏朝廷大議論許臺諫見宰執商議乎吏曰有遂赴都堂議取書事宰執皆
以爲然帝親筆召如淵李誼入對明日宰執就館見金使受書納入禁中人
情始安又嘗與施廷臣忿爭廷臣謂如淵有指斥語帝謂檜曰以朕觀之廷
臣罪小如淵罪大檜請斥廷臣徒如淵待其求去帝不可皆罷之後檜擬如
淵知遂寧府帝曰此人心術不端遂已兩奉祠卒年六十二如淵始以張浚
薦召終乃翼秦檜擠趙鼎讎呂本逐劉大中王庶心迹固可見矣宋史本傳 邑鄉
賢舊祀如淵清同治間諸生苟正寅等訴於有司撤其主新采

謝方叔字德方威州人嘉定十六年進士歷官監察御史屢有諫諍帝悅差
知衡州除宗正少卿又除太常少卿兼國史編修錄檢討復遷殿中御史屢

灌縣志

卷十八 撫餘紀

二十九

言時政請錄朱熹門人胡安定呂燾蔡謨詔皆從之後拜端明殿學士簽書
樞密院事參知政事淳祐元年封永康郡侯尋拜左丞相封惠國公宋史

元吳澄張達善墓誌謂葬羊子縣之蜀岡地在今江蘇省前志以爲在灌東
導江鋪非是蓋逕流寓東南未嘗返蜀導江乃其故里附近有安羊橋俗名

羊子橋載筆者失考因以致誤新采

清初大吏皆駐保寧順治十六年民瞻始駐成都翌年並移司道駐此康熙

中吳三桂併有蜀地久之乃滅今邑中廟宇碑碣往往有大周年號云前志新采

大小將軍丈人觀牡丹名也蜀郡桑門悟光題錢舜舉折枝牡丹曾及之詳文

徵自注云青城山丈人觀前牡丹一高十丈名大將軍一高五丈名小將軍

明洪武庚寅正月大將軍花開相傳花甲一周始作花蜀獻王遣使視之取

花以回

池北偶談
蜀故

明崇慶志久佚惟名勝記引有數條其一云阜江逕江源至新津入河昔張道陵投墨於此其水盡黑故名杜甫有阜江北橋詩崇慶縣志按阜江卽灌境之正南江古所稱阜里水者也

清順治八年初舉鄉試於保寧十六年收復成都不暇修貢院鄉試仍在保寧康熙初以策論取士八年復用制藝雍正七年以遵義改隸貴州撥去舉額四名同治間以全省歷捐軍餉永加定額二十名共八十名前志綜有清代灌縣舉人共六十一人得成進士者五人入翰林者一人而已

清順治十三年川南始耕民自耕也自二年獻賊屠蜀野無民城無令者十年至是邛雅始開墾漸及下南道諸州縣始設正佐官然無城郭居有民之所月食其供亦有傳食者略上下之分修賓主之儀否則無所得食十七年初招墾官爲招也時初設郡縣守令民復故居者甚少總督李國英招民墾殖查報民

灌縣志

卷十八 撫餘紀

三十

數視其多寡而毀最之前志

青城三十六峯奇秀特甚自此入山非累月不能窮其勝山中嘗有百餘歲人獻賊據全蜀時亦未深入也居易錄

漁洋山人云青城有山市當天清氣朗一望皆城郭都市屋瓦螺青車馬人影往來絡繹甫訖異間移時隱滅灌記

明宣宗實錄云宣德三年四月乙丑四川灌縣陰陽學訓術嚴亨奏本縣都江等四十四堰洪武間築以障水灌溉民田比因江漲衝決乞仍發民工修築爲便上命行戶部移文有司令農隙用工世宗嘉靖十一年僉事張彥議築都江堰石工不果按籠石係古法元改用鐵明仿之而明初則仍用石也任慥渠堰志云九昇口堰其源出於皂江至郫之柵頭別流爲溫江口曰九昇口者實兩江之匯也晏公類要云郫江一名皂里水杜子美皂江竹橋詩

即此地

明陳節迎祥寺碑謂據灌志寺在邑東云云是明代本有邑志獻賊之亂文獻無存清乾隆間始復草創今所謂舊志者也光緒間續修則曰新志

明山東巡撫焦維章墓前志以爲在邑東酆都廟側聞耆老言清光緒間里人於叢棘發見墓碣乃維章伯母墳假官爵以題碣耳新采

灌縣試院舊稱考棚在未修建時考試均在縣署卓堯由應試者自備前志稱咸豐以前邑紳蒲映旭捐銀七百兩建院又稱咸豐初年知縣馮紹俊以局試無所極力募修同治時知縣胡圻設法增建是考棚非國家稅地方稅提撥購置者也民國二年九月因改設學校名曰官立當道遂誤認爲官產校長陳國祥徧詢紳耆張小南稱考棚係咸豐三年伊父朝清同唐慎修官澤貴梁宣泰等八人倡捐修築地址購自曾姓原名曾家花園價六百餘兩

灌縣志

卷十八 撫餘紀

三十一

實非官荒國祥卽以證據報知縣署轉懇當道備案不得列入官荒競賣而學校日形擴張詳陳氏新建自習室記新采

民國元年夏五月二十二日夜洪水氾漲岷沱二江所壞田園甚多而灌視他邑尤甚諸生羅絢文彙述被災事有足爲法戒者某甲居河干水至舍母而負其妻竟溺斃母仍無恙一婦抱子浮沈於驚濤駭浪中卒死有孕婦不坐牀頭被水捲去飄蕩附竹蘆以挽惡少某見女尸傍岸持竿索之適一物浮至奮身往取滅頂以沒有精堪輿者賤值購地易一水碾一夕化爲烏有某老年八旬舉家葬魚腹忽聞人聲令速去則以無家可歸郤之忽飄泊河干獲銀以歸人謂陰德所致一麪館臨江其旁有擔麵某生者同淹沒而館人獨蕩岸獲蘇河洲有結廬者夢有人叱之去詰旦即遷因得免有木工數人攀橋避雨遙見燈火遠至議折橋急走避之橋遂塌新采

宋樹森撰江原人士考謂灌之建邑仿自蜀漢都安合江源郫縣虢爲一區域分土分民界難確定如江源之常洽王嘉輩郫之何祇羅衡輩其人不妨兩屬蓋江源與郫固多灌之舊壤也以是類推則緜虢人物亦應載姑存其說於此新采

唐九如者爲人富而俠相傳清初有北人流落川中九如厚遇之不肯言其姓字已而歸遂不復見然自是大吏之從京來者每致聲相訛言受某巨公託也九如時至成都與大吏遊甚懽而始終無所求云九如居縣治井福街子孫徙居蒲村今二百年矣蒲村唐姓號大族來自他省凡三系皆不同宗

同籍也新采

民國十一年夏大雨崇義鄉聚源場民家忽有魚數頭銜尾落屋上以爲不祥延羽士禳之按魚因雨激而飛本不足異杜子美詩震雷翻幕燕驟雨落

灌縣志

卷十八 撫餘紀

三十二

河魚蓋古有之矣新采

馬跑泉著於明末在崇福寺側相傳爲杜光庭建冲妙觀處卽錄異記所云老君觀處碑碣失考無從取證姑存之以俟博雅按崇福寺古關廟也獻賊之亂鄉人方演劇賽神賊至聚而殲焉寺中楹柱燒痕宛然亦相傳爲逆所

遺云灌記

文家場卽今崇義鋪見蒲聯芳祖墓碑陰記官家場在今聚源場南見游觀義塚碑皆明以來市聚之遺蹟也新采

灌縣昔爲永康軍公署左側有木牌大書永康驛廝養傳遞公文設馬廐於此清末裁驛用郵寄民國並其牌而去之新采

川軍鄭旅駐灌時有參謀范愛衆者披剃受戒號能普撰有金壇寺發見記略云民國十三年四月初五日佛誕將臨予爲誦法華經是夜夢遊某寺人

謂此靈山法會地一比邱跌坐云是西來祖師醒問朋儕均不悉已而訪羅君克舟所談與夢合乃偕友出玉壘關至馬超坪見古金罈寺僅破屋一椽有印度僧跌坐石像而山後有白沙老索橋石門上刊藏文傳君純德言灌志載阿世多尊者天竺人唐初入中國卓錫灌口靈巖山此寺在山後殆其初到時所住與白沙李叟爲予言過小河登二坪有石罈子亦古廟遺基地中有碑云是處爲雨灑寺對山爲金罈寺故居人沿用此名其下有羅漢寺則以對河爲大佛山而附會之予往二坪見一塔高丈餘知爲古僧塔頂圓如罈俗稱石罈殆以是耳塔基爲方丈之臺碑在其下未能掘視據此則金罈寺爲古叢林甄瓦石礎往往見之陵谷變遷寢成劫灰矣新采

崇德祠於民國十四年燬邑西石頭菴居民忽傳神遷於此禱者紛集亦異矣新采

灌縣志

卷十八

撫餘紀

三十三

民國十五年丙寅端午前二日距漩口場九里之三倒罍有貧民胡姓育女方五歲夜與父寢父於夢寐間若有物伏己者驚覺捫之失女急視以火杳無蹤跡惟門前有腦汁數點而已越五日鄉人斃一虎修八尺不遠得人手一即女手也新采

距漩口場里許有王某者身短而背隆起人以駝子名之素負勇力所居環石牆頗堅固一夕聞門外有聲如攪壁意謂重門深鎖必無他虞寢如故已而聲益厲疑爲盜執挺出但見兩目熒熒如電莫辨何物直前擊之物起攖其面與手痛不可忍呼家人擁火出物騰簷去不知所往晨起檢視蹄跡大如盃失犬羊各一蓋豹也而王則如戴面具與鬼爲伍矣新采

李膺益州記延慶觀高峯有石室名龍宮可容百餘人從龍宮石室至石梯名龍橋又有一石梯洞穴深濛莫知所極西北一石室宛然見存相傳爲甯

封子所居記所稱石室或卽今之朝陽洞亦未可定以龍橋之西北未聞有

其他巖穴也

青城山記補正

清末溫江有周某者頗以神權惑人謂劫運將至行善可免人或信之其子推行父說益臻詭異庸愚被蠱如蟻赴羶罔衆斂財聲氣漸廣因入青城望坡崖築室以居開會傳法動至數十百人民國十八年當道慮生事端飭隊捕之時縣長爲高凌霄邑人相誑以爲凌霄殿審周神仙其徒猶謂數不可免周早知之云周在獄數月多方求脫唐縣長始釋之

新采

灌縣昔爲永康軍河西地爲青城縣俗稱縣曰灌陽今浙江有永康縣山東有青城縣河南有青城驛廣西有灌陽縣地異名同不可忽也前志因青城山人而誤王璫爲灌人因張璠葬揚子縣而誤爲在邑東羊子橋皆不審慎所致

灌縣志

卷十八

撫餘紀

三十四

神道設教古有之矣民國十五年有某甲者指揮少年擣毀廟宇自謂破除迷信卽欲攘據產業鄉人憤而訟焉執將官裏去倖得免今政府規定條例去淫祀而保存先哲與宗教一舉兩得激者當無所藉口矣

新采

治東門太平橋跨沱江最衝要初甃以石高可望城內清道光三十年庚戌圯於水改建以木閱七十七年爲民國丙寅夏五月十九日木筏橫流而下折柱橋崩聲喧塵起葬魚腹者百餘人獲救者僅數十人有安某年八十餘販橋上遇厄乘木櫃漂十餘里復起有廖嫗於水中緊握綿帶流三里而帶挂堰石亦得免

新采

民國煙禁大弛縣設禁煙局而吸者愈多俗稱黑化有籌款員某苛罰種煙者二萬緡違章勒追幾致死長官知衆怒難犯始釋種者然公所皆設煙具

無所謂稅也

新采

古金華菴距金馬場八里其舊址今雷氏宅也民國十四年乙丑造屋掘土得石碑字跡漫漶約略知爲陳氏墓誌有卜葬崇義鄉泉水河等字尙晰按今金華菴東西一舍南北十里皆金馬鄉界碑云崇義是金馬鄉屬崇義鄉無疑菴側河今無泉水名或此地流泉入河嚮稱泉水耳右軼聞贊曰陰陽五行者神州學術之直幹而物質之原始也旁薄鬱積牢籠百態語小天下莫能破焉夫神理至隱人事至紛軼於常情詎曰虛誕况又有事蹟可徵耶附著於篇當亦博物君子所許耳

灌縣志

卷十八

撫餘紀

三十五

灌縣志附載

勘誤表

卷數 頁數 行數 謬舛

卷十五政績 第四頁 第十八行第一字 出誤作而

同 同 第十九行第十二字 城誤作川

同 同 第二十行第八字 障誤作璋

同 第七頁 第九行二十九字 名誤作民

同 第九頁 第十四行第二十二字 未誤作來

同 第十三頁 第十三行第二字 圻誤作圻

同 第十四頁 第十六行第九字 權誤作建

同 第十六頁 第二行正文 有字下脫一王字

同 第四頁 第十六行正文 坊字下脫一記字

同 第五頁 第六行第六字 娶誤作聚

同 第七頁 第一行第九字 粵誤作奧

灌縣志附載

勘誤表

同 第九頁 第十行第二十字 州誤作洲

同 第十頁 第二行夾注 氏誤作民

同 第十三頁 第十八行第二十五字 二誤作一

同 第十四頁 第五行第二十八九字 索誤作素

同 同 第十三行第一二字 以語衍文

同 同 第二十二行正文 謂弱二字誤倒

同 同 第七行第二三字 治字下脫一事字

同 第十六頁 第四行正文 引伸誤作借引

同 第十八頁 第三十一行第三字二十三字 銅字下脫一柱字

同 第一頁 第一行第十字 幹誤作幹

同 第二頁 第二行第二十九字 治誤作政

同 同 第二十一行第二十字 異誤作異

同 同 第二十二行小注 伐誤作代

同 同 同 傳誤作記

卷十七故實

卷十六禮俗

卷六

第九頁 第二十一行第八字

聞誤作聞

同 第十頁 第三行第二字

僅誤作謹

同 第十三行正文

浪裏二字誤倒

同 第十二頁 第二十一行正文

居民二字誤倒

同 第十四頁 第十一行至十五行

與前復而文略異

同 第十五頁 第一行夾注

脫右神話三字

同 第十六頁 第十八行第十九字

慄誤作慄

同 第十七頁 第十一行第二十字

珠誤作球

同 第二十行第二十二字

扶誤作特

同 第二十頁 第十行第一字

略誤作駱

同 第二十一頁 第十一行第七字

隋誤作徵

同 第十一行第二十字

害誤作爲

灌縣志附載

勘誤表

三

同 第二十二頁 第七行夾注

跋誤作錄

同 第二十五頁 第十五行第三字

闕誤作關

同 第二十七頁 第十七行第二十八字

叟誤作史

同 第二十八頁 第一行第十一字

厲誤作勵

同 第二十九頁 第八行正文

本字下脫一中字

同 第十七行正文

民字上脫巡撫高三

字

同 第三十一頁 第八行第一字

扁誤作局

同 第十六行正文

不字應在卒字下

同 第十九行第二十八字

泊誤作洎

同 第二十行第二十一字

謀誤作某

同 第三十二頁 第五行第十一字

傳誤作傅